

մայրիկս միտքս է, իւր անկողնին քով կը պառկէի. նա զիս կը սիրէր, կը պագներ, մենք պզտի ծով մը ունէինք. ես այս ամէնքը կը յիշեմ, երբ առանձին եմ: Մենք բարբարոս ենք, պէտք չէ այդ յիշատակութիւններն ընենք, այնպէս կ'ըսեն ինձ ամէնքը, բայց միշտ այդ բաներն իմ միտքս կ'ուզան. եւ ես կը սիրեմ այն տղայութեան ժամանակները, այն լեռները, այն ծաղիկները, հոն ոչ ոք ինձ չէր բարկանար, ամէնքը քաղցր էին ինձ հետ, ամէնքը զիս կը սիրէին:

– Քեզ հոս չե՞ն սիրէր, Արփենի:

– Չէ՛, ես հոս Արփենի էլ չեմ. Չոյի եմ: Մէկ նոր մարդ մը եկաւ հիմա, մեր տիրուհունյն եղբայրն է. նա զիս կը սիրէ. բայց ես այդ մարդէն կը վախեմ, կը քաշվիմ, նա զիս իր փոքրիկ բարբարոսը կանուանէ, երբ զիս գիրկը կառնու, կը համբուրէ ինձ սոսկում կ'ուզայ, կը փախչիմ: Իսկ ուրիշները զիս չեն սիրէր, այդ մարդն էլ չեմ ուզէր, որ սիրէ:

– Բայց մենք քեզ կը սիրենք, Արփենի, չե՞ս ուզէր մեզի դառնալ, այն լեռները երթալ, այն ծաղիկներուն երթալ, որ դու ըսիր թէ կը սիրես:

– Կարելի՞ է դառնալ՝ հոն երթալ. ամէն բան կործանած է հոն, ըսին, բարբարոսք ամէն բան ոչնչացուցեր են, այրեր են. մարդիկը բոլոր սպաններ են:

– Բարբարոսք ամէն բան կ'ուզեն ոչնչացնել, բայց մենք աստուծով կը շինենք, եւ բոլորովին չենք ոչնչանար, ինչպէս զիս կը տեսնես, որ աստուած պահէր, որ զքեզ դամ ազատեմ եւ տանիմ նորէն քու մայրիկիդ տունը: Աիս չե՞ս յիշէր, Արփենի:

– Ես զքեզ կը յիշեմ, որ զիս ձիուդ վրայ կառնուիր, բայց ես հիմա էլ չեմ ուզէր ձիու վրայ նստիլ, ետքը հիւանդ կը լինիմ:

– Խեղճ Արփենի, այդ անզգամը զքեզ վախցուցեր է: Յիմա ինձ այն զրուցէ՛ չե՞ս ուղեր քու եղբորդ, ազդականներուդ, քու տունդ երթալ, որ զքեզ կը սիրեն, եւ հոն տիրուհի լինիլ:

– Ինչպէ՛ս չեմ ուզէր,– ըսաւ աղջիկը աչքերը բանալով,– բայց կարելի է երթալ, ինձ այն զրուցէ:

– Ես պիտի երթամ, կ'ուզա՞ս հետս:

– Կ'ուզամ, բայց կը թողո՞ւն: